



MSM rancang hidupkan semula ladang tebu dalam negara

Oleh **BERNAMA** - Mei 12, 2025 @ 11:44am



Gambar fail. Ketua Pegawai Eksekutif Kumpulan MSM Malaysia Holdings Bhd, Syed Feizal Syed Mohammad (kiri) menunjukkan produk keluaran MSM. - BERNAMA

KUALA LUMPUR: MSM Malaysia Holdings Bhd (MSM), pengeluar gula bertapis utama negara, merancang untuk menghidupkan semula perladangan tebu dalam negara sebagai langkah strategik mengurangkan kebergantungan sepenuhnya kepada gula mentah import.

Ketua Pegawai Eksekutif Kumpulan MSM, Syed Feizal Syed Mohammad, berkata inisiatif itu penting dalam menangani risiko global yang semakin ketara, termasuk perubahan iklim, ketegangan geopolitik dan gangguan rantai bekalan.

"Memang MSM kini bergantung 100 peratus kepada gula mentah import. Namun pada masa hadapan, insya-Allah, kami akan kurangkannya. Kami sedang menjalankan kajian untuk memulakan semula perladangan tebu di Malaysia," katanya menerusi program 'Bual Bisnes' terbitan Bernama TV yang disiarkan Sabtu lalu.

Menurutnya, Sarawak dan beberapa negeri di utara Semenanjung dikenal pasti sebagai lokasi berpotensi bagi perladangan tebu berskala besar.

Sebelum ini, MSM pernah mengusahakan ladang tebu seluas kira-kira 4,000 hektar di Chuping, Perlis sejak 1970-an, namun operasinya dihentikan kerana skala pengeluaran yang tidak lagi ekonomik.

Dalam masa sama, MSM turut meneroka potensi penghasilan gula alternatif berasaskan sumber selain tebu seperti gula nira daripada palma, sejajar usaha mempelbagaikan sumber bahan mentah.

"Di Eropah, mereka gunakan ubi bit sebagai bahan mentah alternatif. Namun, ia tidak bersesuaian dengan cita rasa pengguna di rantau ini.

"Kami mempertimbang untuk mengkaji potensi gula nira, contohnya daripada kelapa nipah. Mungkin bukan dalam skala besar, tetapi insya-Allah cukup untuk memenuhi keperluan pengguna yang menggemari rasa gula nira," katanya.

Beliau berkata, usaha mencari sumber bahan mentah alternatif adalah sebahagian strategi jangka panjang MSM dalam memperkukuh daya tahan rantai bekalan dan menyesuaikan diri dengan trend pasaran semasa yang sentiasa berubah. - Bernama

HEADLINE	MSM rancang hidupkan semula ladang tebu dalam negara
MEDIA	Berita Harian - Online
DATE	12 May 2025, 11:44am
BY	-
LINK	https://www.bharian.com.my/bisnes/korporat/2025/05/1394980/msm-rancang-hidupkan-semula-ladang-tebu-dalam-negara